



Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Takornarissat tikillugit sullissinermik inuussutissarsiuteqalerusuttunut inuussutissarsiuteqareersunullu ilinniarfimmik pilersitsinissamut, soorlu: outfitteritut, qimussiussisartutut il.il. naalackersuisut suliaqaqqullugit peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortaq Aleqa Hammond, Siumut)

Tungavilersuut:

Nunatsinni takornariaqarnerup inuussutissarsiutitut inerisarneqarnissaa Naalackersuisunit inatsisartunillu 1992-imi aalajangiunneqarmalli qujanartumik takornariaqarnermik inuussutissarsiuteqalerumallutik ingerlatsilersut siunnerfeqarnerusumik inuussutissarsiorsinnaalernissaminnik siunnerfeqarlutik inerisaalerput. Pisortatigoortumik nunatta aningaasarsiornikkut ineriartortinneqarnerani sukarsuurtut taaneqartartut pinggaarnerit pingajoraat takornariaqarnikkut aningaasarsiorneq.

Siornatigut ukiualuit tamatuma siorna takornariaqarneq immikkut soqutigalugu siunnerfigalugulu ilinniartitaaneq aallunneqarnikuvoq, ajoraluatumillu takornariaqarnikkut inuussutissarsiutigalugu ilinniagaralugulu aallunneqarnera annikilliartorpoq ilinniarfitsigut pingaartinneqarnerata apparneratigut. Tamatta ilisimavarput periarfissaqartitsineq periarfissanik atorluaasunik kinguneqartarmat isumaqarpungalu takornariaqarneq kisiat siunnerfigalugu ilinniarfimmik peqalernikkut nunatsinni nunaqavissunit inuussutissarsiutiginissaa atorluarneqarnerunissaalu angusinnaangipput.

Unnuisitsisartut, qimussiussisartut, pisuttuaassisartut, nerisitsisartut, kaffisortitsisartut allarpassu-artigullu takornarissat misigisassaannik kiffartuunneqarnissaannillu isumaginnittuusut pikkorissarfeqarlutik ilinniarfeqalersuugaluarpara siunissami Nunatta Takornariaqarnermi Siunnersuisooqatigiivisa takornariaqassutsikkut tikitalersussat siunnerfigisaat nunaqavissunit aamma kiffartuunneqarsinnaalersikkumaannarnagit aningaasarsiorfigilersinnaanissammatigik.

Isumaqarpunga takornarialerinermi ilinniarfeqalernikkut maannakkut takornarianik kiffartuusseersut periarfissinneqassasut pikkorissaqqittarnissaminnut aammalu isumagilluinnarpara immikkut ilinniakkatigut soraarummeerfiusumik ilinniarfeqalernikkut siunissami nunatsinni nammineq inerisakkatsinnit takornarialerisussanik inerisaalersinnaasugut.

Aningaasalersorneqarnissaa pisinnaavoq konto 62.05.09-kkut nutaamik pingaarnersiuinikkut. Qanormi nunap aningaasarsiorfissatigut siunnerfigisaa innuttaminit atorluarneqanngitsoorsinnaava ilinniarfeqannginneq peqqutaalluni, taamaattumik isumaqarpunga takornarialerineq kisiat siunertaralugu atuartitsineq pikkorissaanerlu aallarnerneqarpat siunissamut qaamasumut nutaanillu periarfissiisumut ikaarsaalerumaartugut.

Taama tungavilersuuteqarlunga naalackersuisut takornariaqarnermut ilinniarfimmik pilersitseqqullugit suliniuteqarnissaannik peqqusivunga neriuutigaaralu inatsisartut inuussutissarsiutip annerusumik pingaartinneqarluni inerisaaffigineqarnissaannut peqataajumaartut.